

10 recomendacion pa vitalisacion di mercado laboral

“Posicion di trahado bieu ta mas sensibel cu esun jong”

ORANJESTAD – E posicion di trahado di edad grandi ta mas sensibel cu esun cu ta jong. Pues ta necesario pa yuda e grupo aki por keda traha considerando cu a hisa e edad di pensioen (AOV) pa 65 aña. Esaki e comision Vitalidad a conclui den su di dos rapport.

Den e grupo di 60-64 aña e participacion di hende homber y muhe riba mercado laboral ta baha te cu mita, segun cifranan. Si entrante 2015 e edad di pensioen ta subi gradualmente pa 65 aña, mester bin un solucion pe grupo aki por participa (bek) den e proceso laboral y stimula e dunadonan di trabou pa tuma nan.

En general e cifranan ta muestra pa tur sectornan laboral na Aruba cu e participacion di personanan di 45 aña bay ariba, ta baha.

E comision Vitalidad cu gobierno a instala den cuadra di e Dialogo Social fin di aña pasa, a bin cu 10 recomendacion pa proteha e posicion di trahadonan di edad grandi y stimula nan participacion den e mercado laboral.

E recomendacionnan ta encera un variedad di areglo fiscal, fondo pa financia e medidanan, un sistema di certificadonan pa tin un bista di e competencia y cualificacion di e trahado, educacion y un areglo pa trahadonan di edad por traha menos den e añanan prome cu nan pensioen.

Posicion sensibel

Cu tur e medidanan aki e participacion di trahadonan ariba 45 aña por crece, cual di un banda ta bon pero por tin su consecuencia cu tin mas competencia pa hende jong pa haya un trabou. Pero e comision Vitalidad ta kere, a base di nan investigacion y combersacionnan cu diferente partidonan involvi, cu esaki lo no ta e caso. E posicion di e trahado di edad grandi ta mas sensibel awor, segun e comision.

Pasobra ta mas dificil pa un persona aki di haya un trabou y drenta bek e proceso laboral compara cu esunnan jong. Y di otro banda por bin cu areglonan pa stimula hobennan di sigui cu nan

educacion y asina pospone e momento cu nan ta drenta e mercado laboral. Asina e hobennan tambe lo ta mas cualifica, locual awe tambe ta un problema, segun e comision.

Pakete di vitalidad

E rapport di e comision a wordo presenta pa prome biaha den e Dialogo Social riba 13 januari e aña aki. E partidonan, gobierno, sindicadonan y dunadonan di trabou, a pidi e comision pa sigui cu e combersacionnan cu entre otro sindicadonan, asociacion di dunado di trabou y NGO. E rapport a wordo finalisa dia 10 di februari y un par di dia despues trata di nobo den e Dialogo Social.

Kico e resultado di esaki ta, no ta conoci ainda. Na e cuminsamento di e luna aki minister di Labor Paul Croes si a presenta un “pakete di vitalidad” pero te awor Bon Dia Aruba no tin informacion si e pakete ta encera e mesun recomendacionnan di e comision Vitalidad. Segun e minister tin un poblacion di mas o menos 106.000 persona di cual 57.153 ta traha. Pa hisa e productividad y pa logra mas participacion, tambe di personanan di edad grandi, e ta bin cu un seccion nobo na Departamento Labor, cu ta esun di Motivacion Laboral.

E minister no a informa si gobierno tambe lo bin cu un areglo no fiscal manera comision Vitalidad a recomenda.

Baha impuesto

E comision a propone entre otro cu gobierno por introduci un areglo fiscal awor caba pa promove bou dunadonan di trabou di tuma hende di 45 aña bay ariba. Por baha por ehemplo, segun e comision, e pago di impuesto riba salario y premio di seguronan nacional. E comision tambe a propone pa bin cu un grupo di trabou pa investiga e posibilidad di un fondo of mas pe sectornan laboral pa financia e medidanan necesario pa proteha e posicion di trahadonan di edad grandi. E placa mester bin for di dunadonan di trabou y trahadonan mes.

Menos participacion den sector publico

E comision ta remarca cu e participacion di trahadonan di cierto edad ta varia den e diferente sectornan laboral.

Tin sectornan y funcionnan den cual trahadonan ta traha mas largo of mas cortico. Por ehemplo manager hopi biaha ta traha mas largo pero den otro funcionnan unda e trabou ta mas pisa (fisico), e trahadonan ta baha mas lihe. Aunke e comision sa di companianan di construccion cu nan no tin problema cu trahadonan ta baha mas lihe pa motibo di edad y e trabou pisa.

Locual si ta remarcabel ta



e participacion den e sector publico.

E porcentahe di trahadonan publico entre 60-64 aña ta 90 por ciento menos compara e grupo di trahado di 50 pa 54 aña. Pe poblacion total e porcentahe aki ta 70 por ciento. Y pa e sector di real estate e porcentahe ta menos, 54 por-

ciento.

Pensioen atractivo por ta un motibo dicon e participacion den e sector publico (tambe utilidad) ta baha asina drastico, segun e comision. Pues e comision ta conclui esaki tambe ta rekeri diferente solucionnan depende e sector laboral. □

ATENCIÓN

Guardian Group

Fatum

Conforme cu Ley di Labamento di placa, Guardian Group Fatum ta pidi pa tur su cliente nan file na ordo pa loke ta Seguro di Bida (Risiko/Spaar/Studie) y Pensioen. Mester tin den file un identificacion valido (paspoort, rijbewijs of cedula di Aruba) y prueba di adres corecto (Registro di censo of recibo di utilidad). Clientenan por bin cu e documentonan original na nos oficina na L.G. Smith Blvd 162.

Nos ta habri di dialuna pa diabierna non-stop for di 7:30 am – 5:00 pm specialmente pa esnan cu mester bin entrega nan ID y prueba di adres. Pa mas informacion por yama na 582-1111 ext 3117 of 3169.

Pasa mas pronto posibel pa asina abo tambe como cliente di Guardian Group Fatum por participa pa gana 2 ticket pa Miami.

Diamars Maart 11 nos lo ta na YMCA, San Nicolas for di 5:30 pm - 8:30 pm.
Diaranson Maart 12 nos lo ta na Guardian Group Fatum for di 5:30 pm - 8:30 pm.
Diahuebs Maart 13 nos lo ta na Club Caiquetio, Paradera for di 5:30 pm - 8:30 pm.

L.G. Smith Blvd. 162 • Tel.: 582-1111 • www.myguardiangroup.com